



閨媛典第十二卷

閨媛總部藝文九

詩

前溪曲

宋少帝

憂思出門戶逢郎前溪渡莫作流水心引新都會故

柳枝辭三首

徐鉉

濛濛堤岸柳含煙疑是陽和二月天醉裏不知時節改漫隨兒女打鞦韆
水閣春來乍減寒曉妝初罷倚闌干長條亂拂春波動不許佳人照影看
鳳笙臨檻不能吹舞袖當筵亦自疑惟有美人多意緒解衣芳態畫雙眉

江南曲二首

田錫

金蟬飾綠雲細靨蘂黃新南浦解清珮西谿采白蘋密竹映深花湖山日欲曛
春腸知已斷脉脉兩難親吳豔若芙蓉乘舟弄湖水照影不知休雲鬟墮簪珥含
笑忽迴頭見人羞欲死歸去入花谿棹濺鴛鴦起

春洲謠

前人

衣縠綃兮美人采白蘋兮水濱
鳥羽翅兮爲飾步羅襪兮生塵
綿綿兮遠道萋萋兮芳草遶山
眉兮淡掃

關山月

文彥博

蕩子久行役遼西戍未還佳人
怨遙夜清淚浥朱顏
薛暉蘭闥寂塵昏寶鏡閒
相思不相見明月下關山

采蓮曲

前人

江南秋色早江上早蓮芳
佳人采紅蕖兩槳渡橫塘
翳日華芝薄隨風錦絳長
蕩舟方自樂綠水任霑裳

夜夜曲

前人

明月流清漢娟娟照洞房
微風吹敗葉颯颯下銀牀
塵晦流黃素鑪銷辟惡香
年年機杼妾獨怨夜何長

陌上桑

前人

佳人名莫愁采桑南陌頭因來淇水畔應過上宮遊貯葉青絲籠攀條紫桂鉤使君徒見問五馬亦遲留

春日詞

歐陽修

試粉東窗待曉迴共尋春柳傍香臺不驚樹裏禽初變共喜釵頭燕已來紅霧初開上曉霞共驚風色變年華香車遙認春雷響庭雪先開玉樹花曉待銅壺剪蠟煤繡簾春色犯寒來畫眉不待張京兆自有新妝試落梅

一日曲

梅堯臣

妾家鄧侯國肯愧邯鄲姝世本富繒綺嬌愛比明珠十五學組紉未嘗開戶樞十六失所適姓名傾里閭十七善歌舞使君邀宴娛自茲著樂府不得同羅敷涼溫忽荏苒屢接朝大夫相歡不及情何異逢路衢昨日一見郎目色曾不渝結愛從此篤暫隔猶恐疎如何遂從宦去涉千里途郎跨青驄馬妾乘白雪駒送郎郎未遠別妾妾仍孤不如水中鱗雙雙依綠蒲不如雲間鵲兩兩下平湖魚鳥

尙有託妾今誰與俱去去約春華終朝怨日賒
一心思杏子便擬見梅花梅花幾時吐頻插欄干數
東風若寄郎重爲歌金縷

採蓮曲

文同

綠纈褶紅繡裳衫盤蜂蝶裙鴛鴦雕瑰錯寶垂鬢長
紫冒翠蓋行新妝蹁躑曲堤下迴塘畫橋送入
波中央羅袖卷起金釧光搖輕撼脆敲短芒丹瓊紺玉低復昂
霑輕粉撲嫩黃蠶腰蛛腹絲飄揚
列坐綵舫求比方笑聲吃吃動明璫挨蒲拂蓼次岸旁風吹落霞供晚涼
西城鷓鴣啼女牆歸來索
酒酌滿觴吳屏蜀帳圍象牀困臥不起燈燭張琉璃盎缶叢生香

春閨

前人

枕帶縈春思窗紗漏曉光蠅蛸傷遠別驢缺感流芳妝匣蒸殘粉薰爐試舊香
洞房燈燭外只有夢
悠揚

折楊柳

前人

垂楊百尺臨池水風定煙濃盤不起欲折長條寄遠人想到君邊已憔悴

拾羽曲

前人

新羅研紅裙襪齊綵縷刺衫花倒提新晴暖日麗煙草金獸齧鎖藏春闌朱橋逼江曉沙白錦帶交
風大堤窄蘭洲遺翎得淺碧歸來驚飛上嬌額

起夜來

前人

曉窗明綠紗蜀錦壓春臥橫腮虎魄冷驚起新夢破玲瓏轉條脫縹緲梳倭墮高軸響銀牀時誤君
車過

望海樓晚景

蘇軾

樓下誰家燒夜香玉笙哀怨弄初涼臨風有客吟秋扇拜月無人見晚妝

戲贈

前人

惆悵沙河十里春一番花老一番新小橋依舊斜陽裏不見樓中垂手人

四時詞四首

前人

春雲陰陰雪欲落東風和冷驚羅幕漸看遠水綠生漪未放小桃紅入萼佳人瘦盡雪膚肌眉斂春

古今圖書集成
愁知爲誰深院無人剪刀響應將白紵作春衣 垂柳陰陰日初永蔗漿酪粉金盤冷簾額低垂紫
燕忙蜜脾已滿黃蜂靜高樓睡起翠眉顰枕破斜紅未肯勻玉腕半揎雲碧袖樓前知有斷腸人
新愁舊恨眉生綠粉汗餘香在蕪竹象牀素手熨寒衣爍爍風燈動華屋夜香燒罷掩重扃香霧空
濛月滿庭抱琴轉軸無人見門外空聞裂帛聲 霜葉蕭蕭鳴屋角黃昏斗覺羅衾薄衣風搖動鎮
帷犀酒醒夢回聞雪落起來呵手畫雙鴝醉臉輕勻襯眼霞真態生香誰畫得玉奴纖手嗅梅花

薄命佳人

前人

雙頰凝酥髮抹漆眼光入簾珠的皪故將白練作仙衣不許紅膏汙天質吳音嬌軟帶兒癡無限閑
愁總不知自古佳人多命薄閉門春盡楊花落

次韻迴文三首

前人

春機滿織迴文錦粉淚揮殘露井桐人遠寄情書字小柳絲低日晚庭空 紅牋短寫空深恨錦句
新翻欲斷腸風葉落殘驚夢蝶成邊回鴈寄情郎 羞雲斂慘傷春暮細縷詩成織意深頭伴枕屏
山掩恨日昏塵暗玉窗琴

題織錦圖上迴文三首

前人

春晚落花餘百草夜涼低月半枯桐人隨遠鴈邊城暮雨映疎簾繡閣空
紅手素絲千字錦故人新曲九迴腸風吹絮雪愁縈骨淚灑繡書恨見郎
羞看一首迴文錦錦似文君別恨深頭白自吟悲賦客斷腸愁是斷絃琴

記夢迴文二首

前人

十二月二十五日大雪始晴夢人以雪水煮小團茶使美人歌以飲予夢中爲作迴文詩覺而記其一句云亂點餘花吐碧衫意用飛燕故事也乃續之二絕句云

酩顏玉盃捧纖纖亂點餘花吐碧衫歌咽水雲凝靜院夢驚松雪落空巖
空花落盡酒傾缸日上山融雪漲江紅焙淺甌新火活龍團小碾闌晴窗

玉女窗

蘇轍

巖竇有虛明朧朧發晴曉真人無儔匹窗下晨妝早門開秋雨入室靜長風掃絕迹杳難尋朱顏未嘗老

夜宴曲

孔平仲

湘江紺碧玉照秋丹楓紅蓼君莫愁江上女兒花見羞吾曹大家行樂休促席相虞美人出羽觴時許飛瓊液天明君醉若相挽肯念奴家隔江遠流蘇小帳屈曲屏留連爲子都忘返

樓上曲

陳襄

金徒抱箭寒更起寂寞孤城一千里姮娥擎出月華來白玉樓臺瑩如水上有佳人紅粉妝妙年學得吹霓裳呼兒將出紫玉笛一聲天外流宮商宮商欲盡何幽咽曲調不成聲斷絕羅衣掩淚愁向天手把瑤華歌一闕寒蟾出兮明星稀良人阻兮天一涯憑軒遙望兮心傷悲願隨鴻鵠兮高飛

廬陵樂府十首

選七

郭祥正

妾擡纖纖手一拂白玉琴琴聲寫三疊寄妾萬里心朱絃斷可續妾心常不足纔驚楓葉丹又見楊枝綠望君君未到妾貌寧長好雲鬢懶重梳從教似秋草鴻鴈殊未來思君一彈琴洽洽別鶴語折盡幽蘭心蛛絲漫相續難繫驂驪足白日無停時雲鬢寧長綠年華要不老不若丹青好對之雖無言猶勝種萱草與子初執手效彼瑟與琴子去既不返誰復知我心寶刀能切玉願斷金烏足

留住枝上春花紅葉長綠懊惱復懊惱憔悴更妍好不見庭中蘭埋沒隨百草
妾身厭塵埃專心
托君子感君一回眴涸轍逢秋水雍容未經年結誓同生死胡爲忽言別短書無一紙愁思夢魂飛
鵲語不成喜歲晚君不來紅妝爲君洗
嗟峨姑射山綽約飛仙子絳唇啟皓玉明眸漾寒水方平
與麻姑相期不死手披黃庭經金字寫青紙胡爲謫人間離合亦悲喜天桃凝露珠東風任吹洗
庭下幽花霧寒霧金鴨冷煙無一縷從君別妾駕紅鸞望斷三山無覓處平時曲調休重舉長袖
空垂不成舞醒眼穿愁送春去獨立殘陽與誰語
英英玉山禾乃是鳳凰食鳳凰殊未來禾生亦
何益幽香青春盡孤根寒露寂委棄同蒿萊咄嗟人莫識

怨別

前人

渡江君別妾恨不如桃葉桃葉解隨君渡江不用楫妾旣不得隨渡江楫如飛自憐妾薄命江頭還
獨歸一步一回首碧雲凝落暉空將盈掬淚和粉灑羅衣

寄別陳氏妹

黃庭堅

西風吹天雲頃刻異秦越叔子從天來忽與同姓別餞行在半途一食三四噎遙遙馬嘶斷芳草迷

車轍引襟滿眼淚回首寸心折母氏孝且慈愛養數毛髮諸兒恩至均如指孰可斲汝今始歸人繇
繇比瓜瓞中畦不灌漑芳意還銷歇黃鳥止丘隅南山採薇蕨擇婦既甚明寡取乃爲悅我開賢女
傳須已爲汝說在宋有伯姬潔身若冰雪下堂失傳母上堂就焚爇吾嘗嘉愿康有婦皆明哲戮力
事耦耕甘貧至同穴彼于視三公其猶吹一吷雍容二南間此婦真豪傑逢時秉鈞軸邂逅把旄鉞
富貴多禍憂朋黨相媒孽等之穀中游巧者未知拙勿以貧賤故事人不盡節母儀尊聖善婦道尙
曲折葛生晚萋萋絺綌代裘褐女工既有餘枕簟清煩謁誰言淮蔡遠曾不以日月跂予升堂丘佇
望飛鳥滅善懷詩所歌行人勿惜別皇皇太史筆期汝書英列

寄衣曲

張耒

秋風西來入庭樹攀條正念征夫苦空窗自織不敢住鳴機愁寂如鳴櫓練成欲裁新絲香抱持含
愁上姑堂別來不見衣寬窄試比小郎身更長

江南曲

前人

平湖碧玉煙波闊菱荷風起秋香發採蓮女兒紅紛新煙中笑語隔煙聞高繫紅裙袖雙捲不惜浮

萍沾皓腕爭先採得隱船篷多少相欺互相問吳兒蕩漿來何事手指荷花示深意郎指蓮房妾折絲蓮不到頭絲不止月上湖平四散歸舟輕楫短去如飛斷腸脉脉兩無語寄情流水傳相思

放歌行

陳師道

當年不嫁惜娉婷抹白施朱作後生說與傍人須早計隨宜梳洗莫傾城

書侍兒小瑩裙帶

李廌

旋剪香羅列地垂嬌紅嫩綠寫珠璣花前欲作重重結繫定春光不放歸

閨恨

謝逸

汲井澆我衣伐石固我墉塵埃不被體寂無人徑通洋洋西江水我車不敢渡夙駕豈不早早行畏多露行止既有義離合亦有時衆人豈無心不如我所之

陌上桑曲

唐庚

蕭疎陌上桑寂寞採桑女蠶老葉轉稀羅敷淚如雨斂袂感雙蛾秦箏一曲歌慙勤謝郎意其如義命何

古樂府

龔況

妖嬈破瓜女爭上秋千架香飄石榴裙影落薔薇下牆外見鴛鴦雙雙春水塘歸來情脉脉無緒理殘妝

爲亞卿作

韓駒

君住江濱起畫樓妾居海角送潮頭潮中有妾相思淚流到樓前更不流

有寄

歐陽澈

瞢騰醉眼漾嬌波心印潛通一捻多密寄斷腸雙麗曲過雲須倩雪兒歌

古意三首

鄧肅

妾身如暮雲陰霾愁漸濃郎來如曉色日高雲自空曉色未應夜愁雲不可重會持一杯酒舉室生春風妾心如寒梅隨郎過江東妾身如飛雪知落何亭中雪花故清絕何人能擊節梅花歲歲春千秋香不滅妾如傍籬菊不肯嫁春風郎如出谷鶯飛鳴醉亂紅亂紅有何好風雨一夕空菊英雖枯淡不隨霜露濃

秋閨詞

周紫芝

西風動簾幕蟋蟀鳴高堂蔓草濕零露秋閨知夜長佳人掩朱戶背燈解羅裳願言鴛鴦夢雙飛入
方塘清影橫疎櫺奈此明月光依依照長夜炯炯明愁腸不恨郎不歸恨月入我牀披衣復起坐
顚翠挑殘釭開緘取素書解結羅帶傍一讀再三歎再讀淚數行終夜不成寢曙色忽滿窗雖云有膏
沐誰能理晨妝

西湖詞

前人

吳中小女結煙鬟自打青腰唱採蓮欲趁歌聲過南浦藕花深處不通船

倣古樂府二首

呂本中

君住長江邊妾上長江去長江日夜流相思不相顧長江日夜流妾心終不改誰謂江頭人相思
不相待

別離行

前人

城頭草木日夜黃九月北風天雨霜月色入戶侵我牀美人乃在天一方舊遊可樂不可忘恨君不

隨鴈南翔恨妾魂守此空房曉風忽來吹夢長夢中與君還故鄉黃金爲屋玉爲堂與君更笑億千場不須合佩雙鴛鴦

三婦艷歌

曹勛

大婦雙綺襦中婦紅羅裾小婦服翡翠理曲調笙竽良人幸安坐美酒傾玉壺大婦織雲錦中婦繡鴛鴦小婦獨無事對鏡理紅妝良人幸安坐帳暖自添香

採桑曲

前人

鳴鳩初拂羽桑葉破新萌采采不盈掬攀多力未生春服浥朝露曉日暎妝明語學流鶯巧身同飛燕輕使君勞借問夫婿自專城

採菱曲

前人

修渚通阿閣蘭舟飾翠旗吳姬年十五乘舟泛綠池菱花羞寶靨皓腕發斜暉行歌棹船去不覺白鷗飛

夜夜曲

前人

舞衣疊翡翠海月挂珊瑚香滿流蘇幄相迎問醉無

獨不見

前人

獨不見誰相憶花影上珠簾明月穿窗隙翡翠暗無光蒼苔點行跡鸞鑑挂珊瑚寶曆銷金碧彷彿
聞簫韶夢想見顏色爲我報新人好好承恩澤君看後庭花芳菲能幾日

王孫遊二首

前人

紅芳開繡戶碧草襯斜陽樓上頻迴首思君道路長
天桃與芳草豔色明朝陽思君念華旦賤妾
惜容光

望行人

前人

西北有高樓窺窻入空碧徙倚遍闌干楊花滿行迹不見行人歸但見楊花白披襟向春風爲我傳
消息春風不見知此意無人識

高樓月

前人

高樓月倒景入闌干人眠綺窗影月在青雲端相攀不可得空成簾幕寒

吳江曲

前人

吳江女兒白如玉花底紗窗傍谿綠玉簫春暖貼朱脣故作陽春斷腸曲扁舟掠水去如飛不見嬌
然一笑時回首江城只孤塔向來一念傷因誰

春江花月詞

前人

羣芳珠箔映春樓樓上珠簾捲玉鉤十二香衢遍羅綺青樓和月爲君愁

春閨怨

前人

著意繡鴛鴦雙雙戲小塘繡罷無心看楊花滿繡牀

幽閨怨

前人

妾年十五從良人良人待旦驅從軍至今遠戍幽山北但見春閨秋草綠年年塞鴈去還來深院無
人空綠苔

自君之出矣二首

前人

自君之出矣龍香消寶衣思君共明月千里奉光輝
自君之出矣妝臺生網絲思君拂團扇相與